

息縣志卷之七

藝文記

息州重修廟學記

元張

瑄

光州學正

天生民而作之君作之師俾司治教以仁裁成輔相之責湯誥所謂惟皇上帝降衷于下民若有恆性克緩厥猷惟后者此也民受天地之中以生其間氣質之美者固不待教戒而後成其餘稟受不齊苟非以教化變其氣質鮮不從情梏性胥淪于邪僻之域古聖王有憂之立司徒以擾萬民命典樂以教胄子興大學於國設庠序於邑期於復其仁義禮智之性明其君臣父子夫婦長幼朋友之倫而後已焉三代所以治隆俗美賴此道

也雖秦政燬絕聖典放棄諸生卒不能熄人心所固有
絕天理所同然蓋天地之常經古今之通義叙之秩之
而典禮不可易因之革之而綱常不可移此道之所以
常存而學之所以不廢也其養育人材陶冶風俗罔不
繇治教而入所繫夫豈渺哉自唐已令定建學設廟之
制太宗貞觀十一年令郡縣皆立

孔子廟元宗開元初追諡曰

文宣王歷代遵爲承制廟學之稱權輿於此欽惟我皇明崇
建廟學踳漢唐而增三代天下承風有不期然而然者
息郡自至元二十五年始建學宮殿廡塲立庠序草創
大德八年春知州邵武畧從與監州馬連忽忠翌同知

孫承事 州判孔從仕廷珪吏目閻斌上謀更新之率
先創輪樂從者衆庀材鳩工易其舊而新是圖未幾各
以及瓜代去今監州伯帖木兒承務同知王承事椿州
判焦敦武思忠繼其事息州等處官民提領薛從道郝
相爲左右功用告成向之頽壞弗支者今也沈沈深邃
矣向之勢將傾圯者今也翼翼嚴整矣旣又籍在州待
除士夫耆宿僚吏爲朔望拜廟之會講劇經理諮詢治
道勉厲生徒宜明教化嗚呼郡之監守諸公可謂知所
先務矣自今以往爲士者知學而道益明爲吏者知學
而政益修爲民者知學而俗益厚自格致誠正以達之
修齊治平自居敬窮理以至於成已成物內外交養時

措咸宜則天理擴充而人欲不修正道流行而邪說不肆上不負朝廷振育之恩下不負先聖垂教之義而於武畧諸公並有光焉學正曹君煥吏目趙君德仁教諭陳君師舉等請誌諸貞石僕固辭不獲敬叙其說以詔來者俾有所考云

息縣重修廟學記

明曹

璉

彰陽人

學校明倫乃賢士攸出之地係至重也三代之時治隆俗美而人才之盛濟濟藹藹充滿朝野者蓋由是耳迨夫季葉正道湮塞異端並興權謀相傾詐力相尙士多游談無根以墳典爲空言以儒者爲迂濶從政者專事乎簿書期會之間刑名督責之末教日以素俗日以偷學校之政於是乎不修矣我國家武截文治內自王宮國都外暨郡邑鄉社悉建學立師以厚倫理而育人才垂有年矣肆皇上承統加意學校修舉廢墜其崇儒重道之意度越前古遠甚所以人文化成而人材輩出良有以哉息汝之劇邑也廟制視他邑爲盛第歲久寢圯

正統戊辰縣令沐陽蔣忠顧瞻非寧逾謀幕僚南漳王
思學捐俸爲倡鳩工庀材更新之役不踰時民不告病
凡殿廡門宇皆煥然聖賢塑像皆粲然黝聖丹漆於前
有光越已巳春上丁司訓舒城胡瑾瓊山蒙亨率諸生
舉禮事升降肅雍裸奠歆格禮成而退曰廟學重新令
幕之功也請刻之石予維學校興廢繫乎有司之賢否
故知尊崇聖教靡民於學爲有司之事則知昔之曠其
職者過矣知昔之曠其職之過則知今之蔣令王幕之
賢而有爲也雖然此爲長民者言也若夫學者之事則
不係廟學有無與張弛之當否也今爾息廟學新矣有
司之責盡矣爲師弟者可不益思勉職業以求無負

朝廷建學育才之美意令幕修葺之盛心願書以告

卷之六

七

重修儒學記

閻倫

邑人

學校之設其來尙矣我皇明建國之初卽詔天下設學校列聖相承恪遵成憲崇而厚之蓋百二十年於茲所以治教與三代並隆而非漢唐宋所可班也然則宏敷治化孰有重於學校者耶息學躬建日久堂廡傾欹齋舍隘陋弗稱成化丁酉典教缺人府檄庠生岳玉署其事生素敏慎有爲卽捐已廩及缺員餘貲若干白於督學陳公時邑侯西蜀侯君珏出帑金益之乃市材庀工董厥役卑明倫堂二步許書樓三間旁樓翼之並堂左右建號舍二十四務極整固堂齋殿廡暨櫺星門則相其腐壞而修飾之丹漆黝堊如度於是缺者補隘者宏

循者治規模視前爲質美矣經始於成化丁酉之春正月畢工於歲之冬十二月爰刻諸石而爲之旨曰學校在天下不可一日而或廢故爲政之於學不可一日而或忽也顧學之修不出於有司而出儒生吾國賢於人遠矣雖然今之學者窮而養於學達而施於政以期比隆三代之人才無負望天子建學立師之意以明督學垂教造士之心於學校爲有光焉是所望於吾黨者也

息州重修公門記

元熊


復

人

河以南藩府數十而汝寧當南北衝供億甚繁汝寧屬
州四而息處東南衝供億頗劇況土瘠民貧其工商往
往自他郡來受廛爲民其公庭初建僅五楹而東西兩
曹則斷橫圯墉兀然於荒榛敗梗間古瓦竄鼠墻墉穿
蛇殆同寒祠廢廬歲丙戌余來息承乏醫學掾時州長
王公履判官王公拳公餘談次冀得人以任之相與屬
之賓佐魯君傑會有邑氓董氏婦以公署北隙地來獻
而同知天水趙公處巖來任魯君以告公慨曰吾亦願
從公後於是公於魯君各捐俸若干授司帑吏俾署吏
李居仁董役戒曰爾匠備爾工役爾衆凡材未陶甃計

而償值不得纖芥厲民居仁一如令勤於趨事精於經畫撤東西曹之弊增屋十有四區越明年公庭之北建幕廳三楹幕廳東南建祠宇三楹而州長王公代去又明年庭之北建內寢三楹庭之東西復列三楹分布曹局庖湏以安上官與使客焉公庭與路門亦撤舊而新之由是衙署翼如宸幕煥如麗譙岌如布政有庭畫諾有所館庫森具櫟桷聲飛昔之卑秋者今則擴而輪奐矣昔之缺畧者今則妥兀於東西前後矣工不告勞民不告病落成有日命余記之嘗謂今之州郡長貳古之侯伯大夫士也今之公衙古之公朝也古之公朝前門而後寢堂室戶牖房夾有儀非所以奉已也蓋飲射於

是讀法於是聽訟於是以布宣天子之詔命不壯麗嚴
整其何以儲神育體清出治之源發號施令動人之觀
感敬畏也鄭子罕曰吾儕小人皆有閭廬以避燥濕寒
暑而在公之署其可玩惕傳舍視之也哉春秋於一城
之築一門之作必謹書於策以示勞民爲重然魯僖之
泮閼奚斯董之史克誦之經不書者以得爲國之先務
也然則是役豈非爲政之先務歟



鐘樓記

董

珪
息州知州

息自金亡僻介淮濱與宋壤接莽焉邱墟者久之國初置州治署監長貳倅暨幕僚胥吏以隸汝寧府始披荆棘立城市招集散亡百務艸創歷數歲經營壘闢然後官寺民居僅有生意元貞元年同知烏君構麗譙二楹於公署之南以節晨昏及至元五年判官于侯敷武由下蔡簿來倅與前監郡也先不花等謀曰鐘鼓所以節晨昏警作息必高其樓以居之於是郡長買閭仲章同知孟元善太初下逮僚屬各捐俸有差仍命侯董其事郡中富者輸財貧者任役足相踵唯恐其後於是旣協厥卜具畚鍤坎地深仍實之築之基堅且崇上建層樓

二十有六尺面勢矗若南北長三丈有奇由東而西架
複道抵譙樓四十一尺棟宇周楹不侈不陋應規合矩
檻楹節比板幹礪平雖風霾雨夕安履堂闌下瞰闕闌
星分碁布坐奠几席間矣嗚呼昔焉邱墟今焉閭閻昔
焉荆棘今焉嘉植昔焉豺狸嗥呼今焉雞犬畫圖民安
物阜不震不驚于于焉徐徐焉興居以時茲可謂太平
之盛事屏藩之壯觀也經始於至正改元之春畢功於
是年之秋官不知費民不告勞又可尚也于侯今將代
去予目擊其事故屬辭不讓亦同寅之義也侯名德字
順卿所歷有能稱其佐吾州也事有當然不避艱險是
宜書

重修廨宇記

佚名

縣有治古也環百里之地統萬室之民政令於是乎出
謀議於是乎成條教於是乎布繇賦於是乎平紳士賓
客於是乎奔走焉禮讓焉苟治事之所弗稱則無以增
威重聳觀瞻息舊有廨宇歲久而敝今知縣事瓊臺陳
侯始至嘆曰是長吏之責也政旣成於是因農隙之時
用羨餘之財鳩工聚材因其舊而新之旣落成以晉索
予記於乎古人之治國如治家信不誣矣今之人往往
知有家而不知有國於所居之室則厚其葢趾宏其結
構以爲子孫不拔之計而於國事恒傳舍視之因循以
需代而已則其所以視其民者罔知也今侯能以家視